

ҚАГАМ ҚУЛИГАМСО

Тыкисималге Нувуқамун сивулик ысқухты амалыи ынқакақат утуқаныхтамта нувуқахмит. Пинипихсимаўқ тана ысқухты. Атама Қергытагым қулигамсусимаңа, тыкитыклъуни калъыхсаўхсимет нувуқахмит. Тағъеңанкуни нақам калъыхтақет. Таўани сивукуль ысқугьяухсимат сивулит ыскулгит, таўани лъыган амта ыльңа ытақуқ. Кылыхтугекут нувуқахминың ыскулгит қангутыкнъагунилуки артелыт.

– Саўгат артелыт? – апықағакут, гуқ, анукағат.

– Гуқ, натын нутагингатун ысаққат юпит ынкам натын тыгигнегақьяхқат.

Таўатылңут қангыт, гуқ, алиңыфкакет ситкунағмит, маюегемит, имтугмит. Натын синит аньяхтутыт гўаягнаюклъуки.

Суная, гуқ, пеқуқ, натын хўаңқумтының тукпимаяпут тунлъяқйипут иқйъаниталгенун. Натын ыльңит акуна ивырулгумалгит анъени. Акуна унахсемиң санаңалге ытфик тукпимая.

Нальңани Нувуқам ысималге илиры Имақлъяқ. Таўавималгит тасаманлъяқыльтың Нувуқамың Нутетегынқук Рахтыңагульу, амта илет. Таўавык амта пимауқ Напасам игныга Тыңеқейын. Имақлъяни ыхкитағаңгата микисқит ысқугумет Николай Кузнецовым. Умелыкума-ам нунам Тыңарын. Атасимың мугуңамалуку Тыңарын, гуқ, мылгарима Тыңеқейым. Таўхкын тана юк итыхсимат-ам, туқусимат.

Тумахнакумалуки Советыт нунами, гуқ, калъыхқарагьяўхсимет нувуқахмит, қулигамсульуки натын ысаққат калъыгутыкумың. Таўатын катымалгит, гуқ, мулупихтақут.

Мумихсильтыңокут-ам сивулит комсомолыт. Мугу-сильтыт нувуқахмит никуйилңут, натын иқйъаниталгит ынкам иқйъанилңут навгасигақьяхқат питутальутың. Сивулит комсомолыт амта ыльмыхтының никуйилңут пинитун. Тарасовын пеқылге: «Атасикун лъякуфси, пинитун лъыхлъякуси»